

# TBCC SCANDAL TUM-HNIHNA LEH A KAIHHNA WIIHAH MIPUIIN SAWRKAR KAN AU EIH A KOHHRAN PAWH RING TAKIN KAN AU A A EIH VE NGEI ANG

Ruatfela Nu

**Lawmthu sawi lo ngahin** Tunlai thil thleng chungchanga social welfare minister, Pi Lalrinpui press conference nung leh dark thlarh kha a team-te nen an inbuatsaihna a tha hle tih a hriat a. Inbuatsaihna tha tak an neih chhan chu, a fawng vuantu an nih vanga inluling mai loin, mipui nena inlaichinna /public relation (PR) tha an duh a, mimal, chhungkua, khawtlang, ram leh hnama harsatna thleng mek, zu ngawlveina leh ruihhlo ngaihna chungchangah mipui au thawm an ngaithla a, mipui phutna/beiseina an pawm thiam vang a ni.

Dik tak chuan sawrkar hian vote duh vangin mipui hi min bum kual mai mai t rei tawh a, thil thleng lian tham pawh an ngaihven tak tak ngai meuh lo, an ti vel mai mai thin. Tun tum zet chu nawrna a na bawka an ti takzet a ni. ‘Mipui nawr ngai loa ti tur pheichu an nia’ la ti talh ila.

Heihi thil lawmawm tak, rahchhuah a neih hma hauh pawha ram mipui tana thawk huaina tham, state sawrkar kan neih tirh atanga tlang (frank) taka thil thleng mipui hnena fiahfai taka a puanzar vawi khatna a ni hial awm a sin! Chu chu mipui tam zawk pawhin kan pawm tih social media site hrang hranga minister press conference tuihnhina leh, ka hmalakna hlawhtling riaka ngaite feedback atangin a hriat theih a ni. Ka hmalakna bik a ni awzawng lo. Mipuiin sawrkar kan auh eihah hian ka aw a lo ring deuh bik a ni pawhin ka zaithiam vang chu a ni lo Chiang a. Engtik lai pawhin, khawi hmunah pawh democracy kalphung zawm ramah chuan ‘Mipui Aw’ hi a chak ber fo vang a ni.

**Dan rorelna tundin a ni dawn ta hi hmasawna a ni:** TBCC a thil thleng tha lo tak tak tuartute’n ka mimal leh kan pawlah an rawn leiko nasa a, rapthlak leh runthlak takte pawh nimahsela tih theih kan nei lo a, thuneihna engmah nei lo kan nih baw si avangin, thuneitu/mawhphurtute hnenah Inquiry Committee din turin ka ngen a. Chu ka lehkha thenluh chu concern minister kaihhruaia meeting pui a ni a, min sawm angin ka tel. Ka lehkha theh luh ngaithei lo pawh an awm a. An ngaithei emaw, ngaithei lo emaw a paw lo a, a pawimawh ber leh ram leh hnam damkhawchhuahna chu thil zawng zawnga “dan rorelna (rule of law) tundin hi a ni fan! Tuna chinah chuan de-addiction centre/home chu dan hnuaiyah dan anga kalpui a ni tawh tur hi mellung thar lawmawm tak a ni a. Dan hnuaiyah kalpui hi a theih tih pawh children’s home siamthat beihpui thlaktu zinga kum 12 zet ka tel atangin ka hria.

**Hnam ral nana ral aia hlauhawm:** Aw le, sawrkar hian engati nge ND&PS Act, 1985 Section 71(1) behchhana “The Mizoram Management for De-addiction-cum- Rehabilitation Centre (Alcoholic & Drugs Addict) Rules 1993” hmanloha kum 27 chung zet an rula raw neih a, “Mizoram Drug Treatment cum Rehabilitation Centre Accreditation (Amendment) Rules 2019” pawh vawiin thlenga a la hman loh tih lam chu sawi tawh lo ila: Kan harsatna

tawh namenlo avang hian sawrkar/mipui leh kohhran tanrual a tul tak meuh meuh ta. Historian ropui Arnold Toynbee chuan “Khawvela civilization 49 vel awm tawh zinga 3 emaw ni chauh chu ral vanga chimral an ni a, a bak zawng chu an khawtlang nun that loh vanga ral an ni” a ti. (Chimral tih hi ‘hnam ral/boralna’ tih a ni thei awm e) Kan tualzal nuna zu leh ruihhlo ngawlveina, hur sualna, hausak thut chakna, eiruk/rukruk pawisak lohna hi kan hnam tlemte tan boral pui nan a liantham si.

**Beidawn a thiang lo:** America ramah 2019 atang khan damdawi hmansual (drug overdose) avangin kumtin mi nuai chuang an thi a. Nikum, 2024 khan OD a thi an tlahniam duai a, mi 80,391 (tlahniam duai hi a la tam eee) an thi a. 2023 khan mi 1,10,035 an thi a. 27% in a tlahniam a ni. 2019 hnua an thih tlem ber tum a ni. Heihi a chhan chu Joe Bidena khan ruihhlo ngawlveite enkawlina lam policy a ngaih pawimawh vang nia sawi a ni. Hemi atanga hian kan hmangaih Mizoram thalai, zu leh ruihhlo bawih tangte chhanchhuah kawnga sawrkarin thapui thawh a tum hi, a 30% vel tala a hlawhtlin ka beisei tlat! Ruihhlo chi hrang hrang ngawlveite chhanchhuah hlawhtlinna rate hi a chaurau khawp a. 10% hnuailam a ni tlangpui a. Mizoramah hian kohhran a tel chuan 50% a hlawhtlin pawh ka beisei hial a. Zu ngawlveina leh ruihhlo ngaihna kaihnawih do naa lungthu pathum- supply reduction, demand reduction leh harm reduction kawngah thapui thawh turin thahrui (political will) nei sawrkar kan au eih a, sawrkar kan auh rualin chhungril lam nuna thu sawi thei kohhran kan au nghal a. Kan au ri hi boruakah a thamral lo ang.

**A thling bawhawkin:** “Tuna TBCC buai vanga chhuah huk zingah drug overdose a thi chuti khati zat an awm tawh” tia an hming list leh an address kimchang rawn tarlan nuam ti em em an awm a. Tute emaw mawhpurh tir an tum a ni. Tu mawh mah a ni lo. Ruihhlo chingdawklakte mawh a ni. TBCC inenkawlina that lohzia pawh phat theih a ni lo. Pu Zohmingthanga hian dan bawhchhiat tur pawh a lo nei lo a. Ama dan siam chawp hmangin a duhdan danin mihring sang rual a lo kilkawi a, a harsa ang tih phat rual a ni lo. Zauthanga Memorial Tawngtai Bethel Camping Centre (ZMTBCC) Chawnpui a nih laiin, a enkawl tura a huang chhunga lut thihna avang bawkin helna a chhuak a, an chhuak hum hum tawh. Tunah TBCC Sakawrtuichhun a nih hnua a chhunga thihna thlenga thi chhungte lungawi lo avang bawkin buaina hi a thleng leh a, ‘enkawl lai, la dam chhin eih lo an chhuak leh hum hum a, engati nge?’ ti ta ila engtia sawirem tur nge ni ta ang? Tin, ZMTBCC a nihlai leh TBCC a nih hnu, vawiin thlenga a hmuna thi leh damdwi in panna kawng laka thi leh, damdawi in thlen pui hnu darkar 24 chhunga thi zawng zawng engzat nge tih hi mi tute’n emaw rawn list ve ta se, buaina lian zawk a chhuah belh mai lo’ng maw u. ZMTBCC/TBCC a an hmangaih leh an mi lungduh dawmhlum loh leh damdawia enkawl loha thi an tam hmel si a. Chuvangin tumah inpuhmawh tawn tawh loin, insawi thiam tum zut zut bawk loin, hmasawn tumin kan awmhmun theuhah kan ram neih chhun Mizoram tan i thawk ang u khai, kan hnam kan tlem em si.

Tawngtai Bethel Camping Centre (TBCC) Sakawrtuichhun mualphona chuan Zoram pum a deng chhuak a. Youtube lamah TBCC boruak a lian chho chak em em a, mipui zawng zawngin Youtuber te thukhawchang atangin ngaihdan kan lo siam a, heti ringawt chu a dik dawn lo, Mizo mipui hi Youtuber hoin min control mai dawn a lawm, ‘TBCC chungchangah mipuiin thu dik kan hriat a ngai’ tiin. Ni, 06. 05.2025 khan TBCC sawi hnawmna zozai thu dik a ni leh nih loh chhui chiangtu tur ‘Inquiry Committee’ din tura ngenna director, social welfare department, govt of Mizoramah lehkha ka theh lut a. Ka lehkha theh luha thuneitute ka ngen nawn pawh, “Inquiry Committee hmaa a chhe lam leh tha lama sawi duh neite tan zau taka sawina hun hawng turin ka ngen nghal bawh che” tih a ni.

Hetia rilru dik tak pua thil ka tih mek laia TBCC tantu ten ‘a letlinga vut tui thlawr’ tih ang maia min puhna ka hriatin ka thin ka sa zak mai a. ZMTBCC a nih lai atanga TBCC a nih hnu thlenga centre chungah damdawia enkawl hlawh lo leh, thi chungte lungawilo sa ka zawng khawm ve ta ngat a. Amaherawhchu he thil ka tih hian boruak tha lo zawk a thlen theih ka hlauh vangin ka chhonzawm ta rih lo.

Aw le, Youtube lamah TBCC a patient ni tawh leh a hmuna patient thi/boral chungte lungawilo thawm a ring hle a. TBCC leh a neitupa Pu Zohmingthanga an sawiselna ringawt hriat chuan, henglai district court lo deuh hlek, International Criminal Court (ICC) Hague, Netherland ramte mitthlaah a lang hial a. Mahse tuman a bul hnai police station ah emaw, National Human Rights Commission (NHRC) ah emaw kan la thlen lo a nih hi. A chhan chu zu nagwlveina leh ruihhlo ngaihna hian namenloa mimal, chungkua, khawtlang, ram leh hnam min tihbuai em avangin, de-addiction centre dintute hi mipuiin hriatthiam thuk tak kan nei a ni. Chutiang a nih laiin TBCC mipui hriatthiam theih loh tawp hun tum hnih a tawng ta. Tu mawh nge? Tute nge dinpui dawn?